

asperitatem, ascensumque arduum ac præruptum difficillimus accessus est.

Ibidem Ping Leang mons est, in cujus vertice ingens planicies, undique à montibus regionis cincta, qui illi pro mœnibus sunt.

Flumina. Pa flumen civitati Pa nomen dat, quam præterfluit: dictum est Pa, quia suis mœandris ac gyris characterem Θ fere efformat, qui Pa dicitur, significatque apud illos sufficit.

Ad Austrum urbis Haitang torrens est, à copia rosarum aquaticarum, quæ Haitang vocantur, dictus.

Tertia Urbs

X U N K I N G.

XUnking urbis territorium etiam montibus non caret, habet tamen planitiem majorem, quam urbs præcedens. ingens hic ubique ferici, pomorum aureorum, radicisque, quam Scorzanera vocant, abundantia est, castaneas fert, quæ ore aliquantulo tempore contentæ per se liquefcunt uti saccarum. Yvus Imperator hunc tractum Leang provinciæ adscripsit, Seng & Cing constellationes illi constituit: sub Cheva familia Jungcheu dicta regio: sub Hana urbs ipsa Ganhan, Tanga Nanke, à Sunga iisque quæ deinceps sunt, hodiernum habet nomen. Fana nobiliora tria numerat, ac decem regit civitates, 1 Xunking, 2 Sike, 3 Fung, 4 Jungxan, 5 Ylung, 6 Quanggan, 7 Kin, 8 Tacho, 9 Gochi, 10 Linxui.

Montes. Ad urbis occasum mons est Co pomorum aureorum sylvis celebris. Sike civitas in monte ejusdem nominis jacet. ibidem est Nanmin mons ingens, qui duodecim attollit vertices altissimos; in eo novem putei salis sunt.

Flumina. Chuen amnis circa Quanggan per saxa volvitur, ac præcipitia in eo sunt ad sex & triginta, Catadupas seu Cascatas vulgo vocant, ex quibus aqua decidit ingenti cum murmure ac fragore. fons Tieju, ad urbis occasum stillans, lacteus vocatur ab aquæ suavitate.

Quarta Urbs

S I V C H E V.

EMporium nobile ac frequens est urbs Siucheu, ingentes enim duo fluvii navium capaces ad urbis mœnia, quæ

orientem spectant, in unum confluunt, Kiang nimirum & Mahu, ille ex Metropoli defluit, hic ex magno Mahu lacu, à quo nomen accipit, ac magnum aquarum simul incrementum; dives proinde urbs est, atque incolis referta, ædificia in ea multa tum privata, tum publica haud contemnenda, inter quæ tria heroibus dicata fana nobiliora. Regio tota fere montibus aspera est, fertilis tamen ac fœcunda parens rerum, quæ ad usum vitæ faciunt, arundinum, cannarumque Indicarum, uti & fructus Lichi nobilissimi ubique magna vis, quæ utraque alibi describam opportunius; loquaces etiam psittacos alit, aliasque aves vocales; memorant olim unum hic ab exteris emptum, ut in patriam eum suam illi asportarent, verum cum eam ex Sina efferre vellent, ita locutam fuisse aviculam: ego Sinarum sum avis, ad exteros ire dedignor, atque ita eam paulo post exspirasse. quis credat tantum etiam belluis innatum patriæ amorem, adeoque illubentes non homines tantum, sed & aves Sinas alio migrare, mordicusque leges patrias observare?

Olim hæc regio à Sui regibus Jungcheu dicebatur, Tanga familia Nanki, hodiernum nomen Sunga dedit, præest urbs civitatibus decem, 1 Siucheu, 2 Kingfu, 3 Fuxun, 4 Nanki, 5 Hinguen, 6 Changning, 7 Junlien, 8 Cung, 9 Cao, 10 Lungchang.

Xeching mons ad urbis Australem partem jacet, lapidea mœnia vulgo dictus, totum quippe montem coronant altissimi vertices. *Montes insigniores.*

Hanyang mons prope Kingfu, ad Fuxun vero est mons Lingyven, in ipsa ripa Kiang fluvii.

Ad urbis Notolybicum Xemuen seu Heng fluvius magna aquarum vi profluit, ibique è catadupa decidit, quæ campana dicitur, siquidem ingenti boatu resonat; ad urbis occasum lacus etiam est quinquaginta stadiorum longitudine, non ita multum latus. Ad Changning fons scaturit multis undique annis septus arboribus. *Flumina.*

Quinta Urbs

C H V N K I N G.

SI quæ alia in hac extremâ Asia splendidam urbem Europæam refert, ea Chungking est, in monte sita, in cujus acclivi adscensu sensim attolluntur ædificia ad amphitheatri modum, alia aliis altiora pul-